

Na osnovu čl. 4.2, 4.7. i 7. Zakona o prijenosu, regulatoru i operatoru sistema električne energije u Bosni i Hercegovini (“Službeni glasnik BiH”, br. 7/02, 13/03, 76/09 i 1/11), člana 33. Poslovnika o radu Državne regulatorne komisije za električnu energiju (“Službeni glasnik BiH”, broj 2/05) i člana 55. Pravilnika o licencama (“Službeni glasnik BiH”, broj 87/12), na sjednici Državne regulatorne komisije za električnu energiju, održanoj 29. decembra 2014. godine, donijeta je

## **ODLUKA O IZMJENAMA ODLUKE O IZDAVANJU LICENCE**

1. U Odluci o izdavanju licence za djelatnost snabdijevanja električnom energijom nekvalificiranih kupaca, broj: 05-28-12-413-29/12 od 17. januara 2013. godine (“Službeni glasnik BiH”, broj 05/13), naziv licence mijenja se i glasi: “Licenca za obavljanje djelatnosti trgovine i snabdijevanja električnom energijom na teritoriji BiH”.

U skladu sa novim nazivom licence mijenjaju se naziv Odluke o izdavanju licence i naziv Uvjeta za korištenje licence.

2. U Uvjetima za korištenje licence mijenjaju se tač. 2.1, 2.4, i 3.14 i glase:

“2.1 Vlasnik licence je ovlašten da obavlja djelatnosti trgovine i snabdijevanja električnom energijom (licenciranu djelatnost) poštujući odredbe Zakona o prijenosu, regulatoru i operatoru sistema električne energije u Bosni i Hercegovini (“Službeni glasnik BiH”, br. 7/02, 13/03, 76/09 i 1/11), Zakona o električnoj energiji (“Službeni glasnik Brčko Distrikta BiH”, br. 36/04, 28/07, 61/10 i 4/13), kao i odredbe definirane u licenci, te odgovarajuće propise u Federaciji Bosne i Hercegovine i Republici Srpskoj.

2.4 Licencirana djelatnost iz tačke 2.1. podrazumijeva trgovinu i snabdijevanje kupaca električnom energijom na teritoriji BiH.

3.14 Vlasnik licence je dužan da poštuje tarife, kao i Pravilnik o tarifnom postupku (“Službeni glasnik BiH”, broj 44/05), Metodologiju za određivanje tarifa za snabdijevanje električnom energijom u okviru javne usluge u Brčko Distriktu Bosne i Hercegovine, (“Službeni glasnik BiH”, broj 90/14) i pravila o snabdijevanju kupaca električnom energijom.”

3. U Uvjetima za korištenje licence brišu se tač. 3.4, 3.17, i 3.18.

4. Prečišćeni tekst licence dostavit će se vlasniku licence.

5. Ova odluka stupa na snagu danom donošenja, primjenjuje se od 1. januara 2015. godine i bit će objavljena u “Službenom glasniku BiH” i “Službenom glasniku Brčko Distrikta BiH”.

Broj: 05-28-12-425/14  
29. decembra 2014. godine  
Tuzla

Predsjedavajući Komisije  
Nikola PEJIĆ

Na osnovu čl. 4.2, 4.7. i 7. Zakona o prijenosu, regulatoru i operatoru sistema električne energije u Bosni i Hercegovini ("Službeni glasnik BiH", br. 7/02, 13/03, 76/09 i 1/11), člana 36. Poslovnika o radu Državne regulatorne komisije za električnu energiju ("Službeni glasnik BiH", broj 2/05) i čl. 16. Pravilnika o licencama ("Službeni glasnik BiH", broj 87/12), Državna regulatorna komisija za električnu energiju, na sjednici održanoj 17. januara 2013. godine, donijela je

## **ODLUKU**

### **O IZDAVANJU LICENCE ZA DJELATNOST SNABDIJEVANJA ELEKTRIČNOM ENERGIJOM NEKVALIFICIRANIH KUPACA**

1. Izdaje se licenca Javnom preduzeću za komunalne djelatnosti "Komunalno Brčko" d.o.o. Brčko Distrikt BiH, za obavljanje djelatnosti snabdijevanja električnom energijom nekvalificiranih kupaca na području Brčko Distrikta Bosne i Hercegovine.
2. Licenca iz tačke 1. ove odluke izdaje se na period od 19. januara 2013. godine do 31. oktobra 2017. godine.
3. Sastavni dio licence su Uvjeti za korištenje licence za obavljanje djelatnosti snabdijevanja električnom energijom nekvalificiranih kupaca.
4. Ova odluka stupa na snagu danom donošenja i bit će objavljena u "Službenom glasniku BiH", službenim glasilima entiteta i Brčko Distrikta Bosne i Hercegovine.

### **Obrazloženje**

Javno preduzeće za komunalne djelatnosti "Komunalno Brčko" d.o.o. Brčko Distrikt BiH (u daljem tekstu: podnosilac zahtjeva), koje je shodno *Odluci o osnivanju javnog preduzeća "Komunalno Brčko" d.o.o., Brčko Distrikt BiH* ("Službeni glasnik BD BiH", br. 20/07, 21/07, 24/08 i 33/09), dužno omogućiti distribuciju električne energije, te vršiti snabdijevanje korisnika sistema i kupaca električnom energijom na svom području djelovanja, vlasnik je privremene licence za obavljanje djelatnosti distribucije i snabdijevanja električnom energijom u Brčko Distriktu Bosne i Hercegovine, upisane u Registar licenci kod ove Komisije pod registracijskim brojem: 05-28-12-017-2/11 od 19. januara 2011. godine, čije trajanje istječe 18. januara 2013. godine.

Saglasno pravu da koristi mogućnost obnove licence i ispunjavajući obavezu iz člana 54. Pravilnika o licencama ("Službeni glasnik BiH", broj 87/12) da prije isteka važnosti posjedujuće licence, izrazi svoju namjeru da djelatnost snabdijevanja električnom energijom nekvalificiranih kupaca nastavi i dalje obavljati, vlasnik licence je podnio zahtjev za izdavanje nove licence koji je zaprimljen pod brojem: 05-28-12-423-1/12 od 3. decembra 2012. godine. O podnijetom zahtjevu odlučuje se u skladu sa internim pravilima i propisima DERK-a i shodno članu 7. Zakona o prijenosu.

Zahtjev je podniet na propisanim obrascima, sa dokazom o prethodno izvršenoj uplati naknade za rješavanje zahtjeva i relevantnim dokumentima koji su, podnieti uz zahtjev ili predočeni naknadno na zahtjev DERK-a, omogućili DERK-u da razumije, razmatra i odlučuje o podnijetom zahtjevu o čemu je DERK obavijestio podnosioca zahtjeva svojim aktom broj: 05-28-12-413-12/12 od 11. decembra 2012. godine.

Po pregledu i provjeri svih formalnih elemenata zahtjeva DERK je najprije 12. decembra 2012. godine objavio u dnevnim novinama i na svojoj internet stranici kratku obavijest za javnost sumirajući zahtjev za licencu i odredio rok do 26. decembra 2012. godine za dostavljanje komentara javnosti na podnieti zahtjev za izdavanje licence.

DERK konstatira da nisu dostavljani komentari javnosti u vezi podnijetog zahtjeva za dodjelu licence, niti je na javni poziv DERK-a bilo koje lice kandidiralo svoj interes da učestvuje u postupku u svojstvu umješaka.

Podnosilac zahtjeva nesporno ispunjava sve kriterije, uvjete i standarde propisane zakonom i pravilima i propisima DERK-a da obavlja djelatnost snabdijevanja električnom energijom nekvalificiranih kupaca jer su njegove tehničke, pravne i finansijske mogućnosti permanentno potvrđivane prethodne dvije godine korištenja privremene licence u toku kojih je o tome pružao valjane dokaze.

Nadzor svih aspekata usklađenosti dosadašnjeg djelovanja podnosioca zahtjeva sa uvjetima i kriterijima za obavljanje djelatnosti snabdijevanja električnom energijom nekvalificiranih kupaca dao je osnova DERK-u da pristupi obnovi licence, odnosno pripremi početne verzije Uvjeta za korištenje licence koja bi važila više godina. Ovaj dokument je od 29. decembra 2012. godine učinjen dostupnim podnosiocu zahtjeva, kao i svim drugim zainteresiranim članovima javnosti, a omogućena im je prilika da iznesu svoje komentare i na općoj raspravi obavljenoj 4. januara 2013. godine u sjedištu DERK-a u Tuzli, uz prethodnu objavu odgovarajuće obavijesti u dnevnim novinama i objavu dokumenta na internet stranici DERK-a.

S obzirom da su na održanoj općoj raspravi izostali bilo čiji komentari koji su mogli utjecati da neki od uvjeta za korištenje licence budu uređeni na drugačiji način, pripremljen je prijedlog da se zatražena licenca izda i dostavljen podnosiocu zahtjeva aktom DERK-a, broj: 05-28-12-413-23/12 od 7. januara 2013. godine. Kako podnosilac zahtjeva ni u posljednjoj prilici do 14. januara 2013. godine, u podnesku podnijetom pod brojem: 05-28-12-413-23/12 od 7. januara 2013. godine, nije isticao neslaganje sa bilo kojom drugom odrednicom osim one o predviđenom trajanju važenja licence, to je bilo osnovano zaključiti da prijedlog smatra sačinjenim u skladu sa pozitivnim zakonima i podzakonskim propisima Bosne i Hercegovine koji reguliraju predmetnu materiju.

Pošto je pregledom statusa primjene svih komponenti koje su odlučujuće za dodjelu licence dobio uvjerljive pokazatelje da podnosilac zahtjeva ima osigurane resurse, organizirane uvjete i utvrđene profesionalne standarde da nastavi obavljati istu djelatnost, priklanjajući se principu postepenosti u određivanju trajanja važenja ove licence, prije nego iskoristi pravo da je istom subjektu izda u maksimalno dopuštenom periodu korištenja, DERK je odlučio kao u dispozitivu ove odluke.

U skladu sa članom 9.2 Zakona o prijenosu, regulatoru i operatoru sistema električne energije u BiH, protiv ove odluke može se pokrenuti postupak pred Sudom Bosne i Hercegovine podnošenjem tužbe u roku od 60 dana od dana objave ove odluke.

Broj: 05-28-12-413-29/12

17. januara 2013. godine

Tuzla

Predsjedavajući Komisije

Milorad Tuševljak